

O BNG levará ao Parlamento Galego a mortandade de peixes no río Muiños

Escrito por VM

Luns, 01 Agosto 2011 12:38



O BNG de Nigrán manifestou estes días a súa intención de presentar varias iniciativas parlamentarias referidas ao problema de mortandade de peixes atopado no río Muiños en Nigrán. A noticia publicada o pasado 21 de xullo por [La Voz de Galicia](#) despertou as alarmas medioambientais para esclarecer por parte do Seprona as causas desta mortandade.

Os nacionalistas pretenden preguntar ao goberno da Xunta sobre os verquidos ao ría e as accións a levar a cabo por parte da administración autonómica.

O deputado do BNG Henrique Viéitez, presentou sendas iniciativas parlamentarias, co obxecto de seren tratadas no Parlamento Galego, relativas a situación crítica que se está a producir de xeito reiterado na desembocadura do río Muiños.

Nestas iniciativas o Bloque pretende, por medio de preguntas para a súa resposta por escrito e oral en comisión, interrogar ao Goberno Galego sobre se ten coñecemento dos verquidos ao río e as actuacións que pensa levar a cabo ao respecto, e de ser así, en qué prazos.

O BNG presentará igualmente unha proposición non de lei na que se insta ao Goberno Galego a adoptar unha solución definitiva, realizando un estudo dos focos contaminantes que producen verteduras, ao obxecto de eliminalos e proceder a sanear o río Muiños ao longo do seu percorrido. Neste sentido, a parte dos problemas que poida causar a depuradora, o BNG de Nigrán denuncia que "un paseo pola rehabilitada senda do río, amósanos toda unha colección de tubos, tuberías e bocas de todo tipo que dan ao seu cauce; o que demostra a necesidade

O BNG levará ao Parlamento Galego a mortandade de peixes no río Muiños

Escrito por VM

Luns, 01 Agosto 2011 12:38

de erradicar, de xeito definitivo, as verteduras ilegais, maiormente de augas fecais, pero tamén derivadas das actividades económicas desenvoltas nas súas proximidades."

O BNG de nigrán manifesta que a presión urbana que soporta este río, do que se pretende que sexa un auténtico corredor verde, predispón que estas situacións se repitan cunha frecuencia e intensidade non desexadas, polo que é necesario actuar de xeito inmediato para elaborar unha relación de focos contaminantes e proceder a súa eliminación, garantindo así o ecosistema que se desenvolve ao longo deste río.